

Inihaan Lingpang tu liniqaiban

Maaq qabasang bunun qai, tis’uni maqanglas a lumaq, uka sui isbaliv nakaunun. Paaqpun pasisiskun munhaan Linpangta kasui. Daqdaqanin mavavalval ismuut, duma’anan is panapataq, duma’anan is ki’a’ama samanglukis siin i tangadaingaz masusuaz. Maaq a diqanin qai, kaupa qani’an baqisdaingaz a vali, nii tu panduduu mavavalval, nii tu naipun is tisqa qudanandaingaz. Anatupa tu qudanan, nii tu panduu kuzakuza’ang. Paaqpun, nii a kucuzista isqaqaliv dau.

Maaqi muntaluqanin a, haiza ka kahanus masasaaq kaul, haiza ka tan’a laziu, haiza ka malkacitaa mu’ampuk tusasaus. Maupin is patan’a idaqvisan tu tastulumaq. Haiza ka malhaqu, maaqi haiza tinishaqu’an a, kuskunun ma’un manahip tutuza. Altupa tu miqdi qani’an kuzakuza qaitu, taunahaanin manungsiv tu sanavan a, kaupin takilibus tu miniqumis nait qazam tan’au’un tu’i’ia. Miliskin tastulumaq qai, asa mudaan mulumaq, masalpu qaitu, nii tu maqtu i napikau’uq i!

Minaupata naak tama kathaan Lingpangta kuzakuza. Daqdaqanin dau naingka tintau tinpaat tu tukii min’anuqu, tangusang taldanav. Uu tu, mina’unin qaising qai, katnakucu mainuk, kitngaa’in kankan taimuqus

sasaqan siin naquudan tu danum tis’ama’un. Katnavau’un a kaul a, tudiip mudaan masaupa navalvalan tu dangi’ananta. Maaqi taunahaanin qamisan a lapa’avan, uka danum maqtu iskusia, aupa minqaitlas a tauzu tu danum. Maaqi asa taldanav a, asa’ang tu siza paav pisqati, natudiip haiza istalhisuq.

Haiphaipinti kama’uka’in a Lingpang tu kuzkuza’un. Katlumaqin amin a bunun. Musuu tu nii’in mahaipi kadu’anan kuzkuza’un i madaingin a qamisan. Is’uka’in a is’ang tu na’asa kasui ka, lusqa’in ilumag malkadadavus, dungzavin mihalang, siin i binanau’az a minkatini kasui saipuk tastulumaq. Aupa pavai’an sui, kilau’in a uvaz’az misbu nii tu vingkiu munata kasui. Maaq nai Puut tauki qai, nii tu masihal malkabunun, samataula’an ata. Qalmang i nii qu viningkiu, sasuu tu maz’av antatalam.

Isia naipi qabasang inihaan Lingpangta kuzakuza kasusui tu liniqaiban. Minaupata naak amin a tamatina miqdidaingaz ita kuzakuza. Nii tu kaupa lutbu ka mamuqudaingaz, sasuu tu isia naipi madadaingaz sintataqu tu iniqdi’an. Naipas sintunanulu mita maikikingna tu, “Asa ata tu masaqlaz hapti tu zidai, aupa miniqdi qabasang a bunun, asa ata tu matintamasaz matinmananu, natudiip haiza mataisqang tu daan.

115 年全國語文競賽臺灣原住民族語言朗讀文章 【巒群布農語】 高中學生組 編號 1 號

在林班工作的歲月

文章主要說明早期族人在林班工作，生活遭遇的辛酸、無奈、勞苦，隨著林務工作逐漸落沒，工人年紀漸長，下山後不容易找到新工作，就越失去信心，甚至病倒，家庭經濟出問題，孩子需輟學外出工作或遇到歧視問題，藉由這段過往歷史提醒我們，要懂得珍惜今天的機會，把上一代的堅忍轉化為力量，走出屬於我們和下一代更光亮的道路。